

欽定剿平粵匪方略

欽定剿平粵匪方略卷二十四 癸丑年

正月初九日 甲寅 勞崇光奏言伏查逆匪洪秀泉

等起於粵西金田新墟等處既而踞永安撲省城由興安全州闖入楚省該逆等每遇移巢皆盡族以行經官兵跟蹤殲斃不少現在似無該逆家屬在粵藏匿 臣屢飭地方嚴密搜捕並無蹤跡惟下游一帶大兵攻剿得手賊勢窮蹙難

保不回竄舊巢臣惟有懸賞購綫設法辦理並諭地方編查保甲諄飭界連楚省各屬扼要嚴防至洪秀泉籍隸廣東花縣其祖父墳墓在該縣松岡嶺弔鐘形等處上年已據花縣知縣牟洪齡查明與馮雲山祖父墳墓一併挖掘並拘獲馮雲山家屬解省審辦又韋政之曾祖韋彩葬於金田亦經前署桂平縣李孟羣查明發掘

聞

其餘各孽種墳墓容再確查發掘以除戾氣再  
逆匪范運得家屬前經拏獲正法至各處土匪  
並當趕緊分投掃捕以期一律肅清奏入報

同日陸應穀奏言探聞賊匪於上年十二月初  
四日攻破武昌十三日至黃州知府及副將將  
居民豫行遷避以官兵詐稱百姓頂香迎賊入

城設席送酒賊匪不覺飲醉官兵將賊匪大加殺戮餘匪向西逃去十七日賊復至黃州復讐十九日行至郭店經向榮派兵趕到復獲勝仗又賊匪於十五日分股至蔡店向民人偏索穀二十萬石錢二十萬串民人許給穀二千石錢二千串十八日賊催齊所辦錢穀滿載欲行復經臣徐廣縉向榮派兵抄截殺賊百餘將錢穀

奪歸大營現在大兵屢獲勝仗賊匪甚是驚恐  
再臣至南陽卽聞新野襄陽均有土匪滋擾拒  
傷兵勇劫奪商船搶掠當舖並製有黃旗擡槍  
大礮等件逆情顯露若不及早殲除深恐裏脅  
愈衆必致勾結粵匪侵犯城池臣當密派兵勇  
前往拏辦至前調到西安駐防兵一千名大名  
鎮兵一千名經臣暫留南陽扼要駐紮今駐防

兵奉

旨調赴荊州大名鎮兵一千名經臣派柏山管帶赴襄陽合剿土匪俟事竣卽當隨臣琦善進剿兇南陽兵太單弱相應請

旨飭催青州駐防兵迅速來南以資防守惟襄陽據楚北上游爲陝豫門戶形勢險要守襄陽則陝西漢中之防堵亦可稍輕至豫省防守南陽亦不

如進兵樊城與襄陽夾守查南陽地勢平曠無險可扼樊城則前臨漢水與襄陽爲犄角若築壘而守彼此救應賊必不敢輕犯可否飭令向榮分派大兵以屯襄陽俟南陽防兵到齊卽酌留一二千名彈壓土匪餘皆帶赴樊城與襄陽合守奏入

上命軍機大臣傳諭琦善陳金綬陸應穀曰襄陽據楚



北上游爲陝豫門戶最關緊要朕曾諭令羅繞典帶兵前往相度駐紮現在該處土匪糾衆搶奪該撫能不分畛域卽令柏山帶兵馳赴襄陽會同該府攻其不備所辦正合機宜此等烏合之衆務宜趕緊殲除萬不可令其與武昌逆衆勾結該撫探聞黃州逆匪情形尙未據向榮奏報不知是否確實惟聞逆匪將城內大礮扛擡上船恐有順流東下之勢該撫亦探

聞賊衆有分三路水陸並進之信是九江以下十分  
喫重現在東路兵單朕甚爲焦急前諭陳金綬酌帶  
勁兵前赴安徽一帶迎勦諒已迅速起行所有調往  
河南之各路重兵諒已陸續到齊現聞賊船蟻聚武  
漢之間琦善所帶火箭施放必可得力著卽帶兵進  
攻如賊匪竟棄武昌漢陽全股東下琦善卽當督兵  
趕緊跟追儘或尙留賊匪牽掣我師亦可酌量分兵

留守該大臣仍率重兵追擊不得以收復漢陽爲詞  
致滋延誤至樊城與襄陽相爲犄角陸應穀擬俟南  
陽防兵到齊酌留一二千名其餘皆令帶兵大員帶  
赴樊城與襄陽全力防衛較之株守豫境更爲扼要  
著該大臣等酌量布置勦辦襄陽土匪亦關緊要儘  
須添兵協勦卽著琦善隨時體察酌撥應援務在統  
籌全局先其所急

上又命軍機大臣傳諭向榮曰襄陽北鄉一帶土匪膽  
敢因武昌失守糾衆搶奪抗拒官兵不法已極若不  
卽時撲滅恐滋勾結爲患著向榮悉心籌畫能否分  
兵會剿儘因武昌一帶賊勢緊急卽飛咨陝西河南  
併力剿辦刻下武漢逆賊蹤跡如何前調湖南船廠  
何時駛到金口儘該逆等棄武昌漢陽全股順流東  
下兩江情形關繫緊要向榮必當統領大兵跟蹤追

剿斷不可稍有延緩若賊留餘匪牽掣我兵而以大股潛入江境亦須查看緩急酌留官兵在楚仍當督率重兵水陸緊追使賊匪無暇喘息與九江安徽江甯等處官兵前後夾擊賊匪進不得攻城肆掠退有大軍緊躡其後剿辦庶可得力從前粵楚失守賊來不能堵截賊竄又不能力追向榮深知其弊豈可自蹈覆轍該大臣軍營有無文員襄辦文案如有應行

調用之人卽著一面奏明一面調營差委據陸應穀  
奏探聞賊匪前往黃州官兵誘賊入城乘醉殺戮賊  
來復讐行至郭店向榮趕到獲勝賊殺至蔡店偏索  
錢穀經我兵截殺奪回各等語河南探報虛實難憑  
仍著向榮確查隨時具奏

初十日乙卯陸建瀛奏言臣於正月初二日行抵

九江探得賊匪攻陷武昌黃州府武昌縣相繼

失守搶去餉銀漕米擄船竄伺江東九江距黃  
州一日可到現經撫臣張芾調兵扼守惟上游  
之黃梅廣濟等八州縣密邇賊巢間閭遷避一  
空臣所調兵勇未齊然賊情緊迫祇得督帶已  
到弁兵卽日前進沿途安撫招集令各團練巡  
防以免勾結一面飛催兵勇師船添募丁壯設  
法咨會提臣向榮合兵攻剿但督臣徐廣縉曾

否渡湖前來尙無確信新任撫臣崇綸亦不知  
行抵何處提臣向榮素得軍心兼收民望惟有  
仰懇

皇上天恩飭派向榮以提督印兼署湖北巡撫事務俾  
官民有所統率奏入

上諭曰向榮已帶兵追剿斷難令兼攝巡撫事

同日向榮奏言連日查探逆匪糧缺知其日內



必逃當於十二月三十日夜傳派各營於正月  
初一日分路進攻臣督兵勇奮力轟擊賊衆敗  
潰都司張國樑乘勢攻入賊營立將土城拆毀  
十餘丈奪獲六百斤大礮二尊器械二十餘件  
據城內百姓逃出聲稱該逆將大礮紛紛搬入  
船內從上游走荊州並分股回竄長沙復據探  
報賊船二百餘隻駛至上游離漢陽三十餘里

之沌口地方隨後尙有賊船陸續揚帆而上等語查沌口係通荊州小河當卽飛咨駐紮金口之提臣蘇布通阿留心偵探如賊上竄卽速跟蹤追擊一面飛調防守常德之總兵青德布趕往荊州會同將軍台湧實力堵剿但恐該逆聲東擊西故作逃竄之計下游之道士湫兵力尙單卽於初二日派令總兵玉山參將劉開泰管

帶兵勇馳往會同該處官兵扼要堵截初二日  
夜見保安大東門一帶火起刻卽出隊進攻派  
令總兵和春秦定三從後進襲臣率總兵李瑞  
等分攻東南二門兵勇直抵城門該逆不敢抵  
拒紛紛下城逃竄我軍一擁而入分投趕殺該  
逆由草湖門漢陽門逃出擁擠上船我軍追抵  
江邊殲斃賊匪多名餘賊撲水淹斃者無數當

將武昌省城收復查探頭隊賊船二百餘隻昨夜已駛下離省六十里之陽邏地方其餘尙在北岸一帶停泊臣已派令總兵和春李瑞秦定三帶兵先由南岸沿江追擊臣現將應辦事件妥爲料理卽日督隊緊躡賊蹤相機督辦一面飛咨琦善派兵繞出江南上游會同圍剿並咨陸建瀛張芾迅帶師船從江中攔擊及照會玉

山劉開泰限以五日趕到九江會同堵剿省城  
收復一切需人料理臣急須督兵追擊不能兼  
顧查河南布政使嚴正基現在岳州辦理轉運  
糧局已照會該員速來武昌查辦一面飛咨調  
任湖北撫臣駱秉章趕緊前來以資表率奏入  
上命軍機大臣傳諭向榮曰武昌收復該大臣派兵馳  
往下游堵截著卽相機進攻與琦善陸建瀛三面會

勦賊匪銀糧輜重盡在船中若能設法燒燬勦辦更易得手湖南船廠是否調到蘇布通阿等若由金口乘船下擊必可得力仍須隨時知照陳金綬兩路夾攻江省兵力太單惟藉南北兩路合勦向榮統籌全局諒必能先其所急賊匪東駛船隻攢聚江面正可乘風縱火燒燬賊船或設伏用間或選派心腹潛入賊中相機行事惟在隨時酌辦朕亦不爲遙制

上又命軍機大臣傳諭琦善陳金綬陸應穀曰武昌逆  
匪被擊逃竄出城現在賊船駛至離城六十里之陽  
邏地方停泊勢將蔽江而下其漢陽城內賊匪諒亦  
潛逃下竄情形危急陸建瀛已抵九江兵單尙難守  
禦疊諭陳金綬繞至安徽迎擊想已起程現在賊窺  
兩江全賴北路重兵星馳截剿與向榮勢成犄角以  
遏其鋒儘株守信陽專以待兵藉口必致貽誤事機

琦善接到此旨卽刻兼程前進相機追剿一面嚴飭  
得力鎮將於江面北岸沿途截追賊船現處下游當  
以火攻爲要著該大臣體察形勢酌量密辦儘經朕  
諄諄訓諭後琦善陳金綬仍不迅速遵辦致賊匪闖  
入九江宿松順流下駛朕必治以遷延貽誤之罪琦  
善赴楚後河南防堵事宜陸應穀督地方官嚴密布  
置勿稍疏懈



上又命軍機大臣傳諭陸建瀛祥厚楊殿邦楊文定蔣文慶張芾曰賊船駛下陽邏地方距道士洑二百餘里恐其順流直下向榮琦善一時未能趕到陸建瀛已抵九江著卽督帶兵勇迎頭遏擊與向榮琦善等分路夾攻互爲犄角不可再令紛竄所帶馬礮六百尊前諭令妥爲位置此項利器必須得力將弁管帶萬不可稍有疏失並著張芾蔣文慶嚴密守禦江甯

省城緊要鎮江瓜州兩處江口亦關繫南北全局斷不可使賊搶占致有梗阻江岸上游亦須密爲布置務期聲勢聯絡互相策應上海現有廣東艇船不下百餘號客商覓雇專爲護送貨船若雇令由崇明入京口可禦上游下竄之賊惟船夫皆澳門人是否可以雇用不致別滋事端仍著妥速籌辦

上又命軍機大臣傳諭楊殿邦楊文定曰鎮江瓜州爲

大江南北咽喉重地漕糧運路文報往來在在均關  
緊要其爲東南門戶較之武昌漢陽尤爲喫緊現在  
楊文定駐守江甯省城楊殿邦計已行抵淮安著卽  
就近駛赴瓜州江口扼要駐紮督同兩淮運使劉良  
駒常鎮道姚熊飛鎮江揚州各知府並會同京口副  
都統相機妥爲布置前任運司但明倫於揚州地方  
素爲熟悉著卽留於該處隨同楊殿邦等協力防守

前諭陸建瀛等調撥崇明狼山福山等處水師爲省  
城聲援是否調到提督福珠洪阿是否已帶兵前來  
瓜州京口兩處祇有漕標及京口協水師兵丁可資  
調遣恐兵力不敷徐州鎮標亦可酌量緩急撥調儀  
徵鹽船及夫役人等如有可用之處並著酌量雇募  
以爲團練防守之助該漕督務須體察情形迅速籌  
辦勿致稍有疏失陸建瀛相距較遠著卽與楊文定

隨時酌辦不可稍分畛域

上又命軍機大臣傳諭張亮基曰現在向榮督兵追剿  
必須礮船應手方可得力其前調湖南船礮若徐廣  
縉及早籌辦何至貽誤至此現值下游防剿萬分喫  
緊著將前次諭令封雇船隻三四百號多安大礮委  
員星夜駛行並飭音德布韓世禧鄧紹良多雇船隻  
招募水摸同盧應翔船隻一併駛往下游聽候向榮

調撥該署督身受重恩若仍縱賊出境以收復城池  
防賊回竄爲詞坐視鄰省下游失事朕必將張亮基  
從重治罪決不寬貸

上諭內閣曰武昌省城收復賊船駛往漢鎮下之陽邏  
地方向榮一面留兵在省防守卽親督諸軍躡蹤追  
擊辦理甚合機宜著卽督率和春等分帶兵勇水陸  
並下乘賊勢竄逃之時迅速追剿毋令會合東駛至

武昌城內文武殉難人民慘遭荼毒亟應大員前往  
綏撫招集著張亮基駱秉章卽日兼程馳赴武昌並  
著嚴正基自岳州先行馳往將被難居民加意撫恤  
戕害屍骸分別查認收殮並將武昌漢陽殉節文武  
官員迅速詳查馳奏其漢陽城中賊匪是否全行逃  
竄著總兵吉順先行帶兵前往收復

十二日

丁巳

上命軍機大臣傳諭陸建瀛楊殿邦楊文定曰昨據向榮奏賊船駛下陽邏地方距道士袱二百餘里大江下游一帶不可不嚴密防守江面船隻亟應收用金山爲南北兩口要隘必應重兵屯守安設防其餘各隘口均須嚴密防備著該督等迅速籌辦鎮江一帶多有善泅者能於水中潛伏數日俗名水葫蘆亦可多爲雇募備用現在賊匪東竄江口要隘關繫南



北全局斷不可使賊匪搶占致有梗阻設防處所尤  
應慎擇將弁管帶兵丁護守船廠木簾毋稍疏虞陸  
建瀛現在督兵九江上游相距較遠卽著楊殿邦楊  
文定妥速籌撥無致延誤前任江南河道總督潘錫  
恩現在告病家居著傳知該員幫同辦理地方防堵  
事宜

十四日 己未 雲貴總督羅繞典奏言 臣奉

命防堵襄陽連日遘行旋於澧州接據荊州將軍台湧  
咨稱臘月二十一日有賊竄至漢陽上六十里  
之蔡店搶掠並稱欲上漢沔而荊州兵力太薄  
應亟添調防兵並接襄陽府知府樊椿稟稱距  
襄陽三十里之雙溝及葉家村店聚有匪徒搶  
掠過客襄陽存城之兵祇有二百餘名不敷防  
勦臣當卽調取澧州分防雲南兵五百名令參

將韋中魁帶赴荆襄一帶添防並將常德防兵  
五百名移紮澧州以固南省藩籬及至荊州之  
金龍寺面晤台灣籌商一切查看城內滿兵共  
有三千餘名城外關沮口塘樓子金龍寺等處  
分防兵一千二百餘名布置尙爲周妥惟下游  
自蔡店至漢川實爲荆襄要隘無兵堵禦臣與  
台灣商調現駐監利之宜昌鎮兵五百八十餘

名先移漢川駐紮適奉

上諭添調陝西綠營兵一千名西安滿兵一千名俟兩處兵到卽可以一千名添防漢川其黃孝一路現有陝兵一千七百餘名並飭各該州縣團練鄉勇以助兵勢臣於正月初八日馳抵襄郡查襄陽水陸交衝爲豫蜀門戶其對岸樊城並無城郭商賈輻輳竊恐匪黨垂涎臣所帶兵勇無

多守勦均形單薄一面咨商河南撫臣陸應穀  
速將南陽防兵移近湖北交界俾聲勢互相聯  
絡奏入報

羅繞典又奏言臣因所帶兵勇鹽糧不敷支發  
適於荊州遇有川省解遞湖南餉銀過境先行  
截留銀三萬兩帶赴襄陽以應急需現在調兵

籌餉刻無可緩湖北除武漢黃三府外其餘七郡皆在省城迤北署督臣尙隔重湖且道路亦形梗塞文報迂遲各府州縣稟商公事難期迅速合無仰懇

聖恩飭令現放之撫臣及藩臬兩司鹽道糧道暫駐荆襄則提解軍餉徵收錢糧及各州縣公事皆得有所稟承呼應始靈辦理較易奏入

上命軍機大臣傳諭羅繞典張亮基駱秉章曰羅繞典所帶官兵鹽糧不敷請於川省解遞湖南餉銀截留三萬兩朕思該處需用孔亟著卽照所請行惟向榮大營籌辦防剿萬分喫緊所需軍餉刻不容緩嗣後務須統籌全局先其所急不得將過境餉銀輒請截留現在武昌省城業已收復前已諭令張亮基駱秉章馳赴省城辦理撫綏事宜荆襄一帶是否仍須巡

撫駐紮著卽會議具奏羅繞典現已馳抵襄陽所有  
團練防堵並緝拏土匪盤詰奸細各事著知會台灣  
一體籌辦不可稍有疏虞

十五日  
庚申 祥厚楊文定霍隆武奏言江甯省城

保障東南自應守禦嚴固下游方可無虞惟兵  
力究形單弱查前次調到省垣留防兵一千八  
百名又續調七百名除派赴蕪湖及東西梁山



官兵二千二百名外存城已屬無多經臣楊文  
定於僻靜營分添調五百名以爲近城鍾山雨  
花臺及北固山等處據險之用而省城縣延寥  
廓實屬防不勝防是前議以防爲守今須以戰  
爲守惟江南兵力柔脆備戰爲難而提標各營  
又節經徵調提臣帶兵亦屬無多且城外僅有  
提臣一軍其勢尙孤除由臣霍隆武選帶旗兵

一千名再派徐州鎮總兵程三光選帶綠營兵  
一千名均於城外扼要駐紮與提臣爲犄角之  
勢外惟有額懇

天恩准於山東之兗沂曹濟等處飭撥精兵二千名星  
馳來甯俾資勦堵至鎮江爲蘇省門戶先經督  
臣飭派副將統帶舟師於京口瓜州一帶會同  
各營水陸交巡臣楊文定復飭該道府紳董捐

資募勇豫籌防堵並咨商 臣文藝將京口駐防  
兵一千三百名京口副將鎮江營參將等各調  
本營水陸官兵共八百名齊赴京口再以師船  
十隻分駐江面並據鎮江府豫立稟稱擬挑旗  
營精壯閒散三千名備用其據險開濠及一切  
守禦之具一併諭令稟商 臣文藝趕緊布置揚  
州經運司督同府縣辦理防衛亦極緊嚴至省

城開挖城濠一事臣等業與前任廣西撫臣鄒鳴鶴及司道等籌畫工資趕緊挑辦所有城守各事宜並經鄒鳴鶴同藩司祁宿藻竭三日之力徧閱城垣指飭營員妥爲料理頃准山東撫臣咨會奉

旨派守備黃富興統帶水師乘駕新造師船迅往江甯聽候調遣現在黃富興赴粵造船未回飭派員弁配

齊師船雇募商艇聽調前來臣等查陸建瀛統  
調三板大船澳艇海鷗八樂等船共計四十四  
隻除派往江西及隨帶迎剿三十隻外所留省  
城備防十四隻業經臣楊文定分派蕪湖梁山  
各江面扼要駐守現已足用如萬一不敷尙有  
水師存營船隻及上海商船均堪調雇至山東  
師船不惟多未成造卽使齊備而遠隔重洋亦

恐緩不濟急自可無須駕駛來江以節糜費奏  
入

上命軍機大臣傳諭祥厚楊文定霍隆武文藝曰江南  
兵力柔脆提標各營又節經徵調福珠洪阿於城外  
設防尙覺勢孤復由霍隆武選帶旗兵總兵程三光  
選帶營兵擇要駐紮與該提督互爲犄角布置尙屬  
周妥惟城內兵力單弱自係實在情形已諭令李德

卽選精兵馳赴江甯以資調遣所有師船無庸調往  
矣揚州鎮江兩郡防務經文藝暨該運司督同府縣  
辦理著卽趕緊布置無稍延緩

上又命軍機大臣傳諭李德曰據祥厚等奏江省備防  
船隻現已足用並稱江甯省城防兵單薄請調山東  
兵二千名迅赴江甯等語著該撫於兗沂曹濟等營  
內揀選精兵二千名派委得力將弁管帶迅速起程

前赴江甯聽候楊文定調遣其前派赴江南之登州水師各船著卽飭令無庸前往以節經費

十六日辛酉蔣文慶奏言臣接奉

諭旨令周天爵協同辦理團練防剿事宜並飭陳金綬選帶精兵數千往安徽幫同截擊查周天爵募勇尙需時日陳金綬現尙不知行抵何處已咨催迅卽來皖日內山東官兵八百名江蘇官兵九百



名陸續到省省垣聲勢漸壯人心較前漸定除  
附城安置紮營並城上按垛派兵外當卽分撥  
兵丁七百名交浙江副將田大武遊擊孫國安  
帶赴宿松會同防堵又撥兵三百名前赴小孤  
山交臬司張熙宇督令協同防剿此外英山霍  
山太湖各要隘擬俟續有兵到再爲分布奏入  
報

聞

十七日壬戌周天爵奏言訪聞逆賊現用木簞輔

舟舟行中流簞行傍岸上堆泥垛槍礮遮列四面直若無基之城有足之馬結陣而行戰船不能及火攻不能透又有連環小簞一遇敵軍可以圍裹又用木簞鋪板上覆厚土接連兩岸可以遏遮上游之師形雖重笨卻利行旅凡過者

皆以銀錢與之如此則川江漢江之兵米不能  
踰越鐵銅等船必被格斷賊如順流東下衝過  
九江安徽江甯各處雖有小隘口恐難抵禦賊  
若水陸並下以遏江西兩廣兩湖之兵則江甯  
勢甚可危揚州以北亦恐震動今祇有屯重兵  
於鳳宿徐州上下四面救應如賊竄至江甯則  
以重兵扼瓜州或溯流到觀音門以木簪厚塞

使不能下則布置可期得手奏入

上命軍機大臣傳諭向榮陸建瀛楊文定蔣文慶張芾  
楊殿邦琦善陳金綬陸應穀曰逆匪竄出武昌全行  
下船屯泊陽邏一帶勢將順流而東業經屢次寄諭  
總以火攻爲上策不知此時上游船礮曾否調齊周  
天爵奏賊匪木簞笨重我軍船礮應手正可順風縱  
火焚燬賊船向榮此時已督軍追赴下游陸建瀛現

在如何禦賊琦善陳金綬是否帶兵由北路趕緊追  
剿旬日以來均未據報實深焦灼九江以下安徽江  
甯水陸要隘必應實力設防尤須上游南北兩路之  
兵前截後追凡遇江口勿令賊匪占踞其船隻必須  
先期收入港汊多備火具繞出賊船上游乘勢焚擊  
陸路扼要處所萬不可令賊截斷總期通盤籌畫進  
可以戰退可以守至軍營必應明定賞格如有斬獲

首逆者無論官弁軍民人等應立加以鉅萬重賞卽爵職之榮亦所不靳著該大臣等明定條款徧行曉諭

十八日癸亥舒興阿張祥河奏言查陝甘兵如甘

省以西之甘涼西肅及河州一帶均應留防陝西各營多經楚豫徵調頗覺空虛是以臣舒興阿將口外換防官兵奏明暫緩臣張祥河於河

南兩次續調兵丁五千名內奏請截留一千餘  
名在陝防堵此時設防之興安商州其間山谿  
僻徑處處可通楚北而潼關爲入陝門戶道路  
扼要亦在所必防現在興安派兵一千五百名  
商州派兵二千七百三十名潼關派兵四百五  
十名尙形單薄擬俟臣舒興阿前往交界處所  
查勘再當量爲續調布置是陝省兵力防堵本

境勢亦喫緊茲奉

諭旨調赴荊州兵丁一千名臣等悉心體察祇有將派  
赴潼關防堵之甯夏延綏二鎮兵四百五十名  
抽調飭令遊擊馬驥管帶並派防商州之固原  
兵內扣出五百五十名委副將錫普常阿管帶  
趕赴荊州以資防剿

同日前禮部侍郎曾國藩奏言臣遵



旨幫辦團練查匪事務於上年十二月二十一日馳抵  
省城與撫臣面商一切因念團練之難不難於  
操習武藝而難於捐集經費若經理非人易滋  
擾累臣此次擬訪求各州縣公正紳耆勸使董  
理其事俾百姓知自衛之樂不復以捐資爲苦  
至搜查土匪撫臣張亮基業經嚴飭各州縣設  
法辦理惟逆燄旣熾長沙重地不可不嚴爲防

守臣察看省城兵力單薄詢悉湖南各標兵丁多半調赴大營行伍空虛不足以資守禦因於省城立一大團練局認真操練就各縣曾經訓練之鄉民擇其壯健而樸實者招募來省念自軍興以來二年有餘時日不爲不久糜餉不爲不多調集大兵不爲不衆而往往見賊逃潰未聞有與之鏖戰一場擱頭一戰者其所用兵器

皆以大礮烏槍遠遠轟擊未聞有短兵相接者  
皆由所用之兵未經練習無膽無藝故所向退  
怯今欲改絃更張總宜以練兵爲要臣擬現在  
訓練章程宜參倣前明戚繼光近人傅鼐成法  
但求其精不求其多但求有濟不求速效誠能  
實力操練於土匪足資勦捕卽於省城防守亦  
不無裨益均奏入報

聞

同日

上命軍機大臣傳諭陸建瀛張芾曰武昌賊匪東竄據  
向榮奏報已屆旬日賊蹤現向何處抑仍在陽邏地  
方屯聚未據續行奏到陸建瀛抵九江將屆兩旬是  
否往上迎擊與向榮所派兵勇合力堵剿截賊下竄  
亦未據該大臣奏聞朕心日深懸念九江爲蘇皖各

省門戶關繫十分緊要該處上游北岸黃州武穴鎮南岸瑞昌馬頭係江廣咽喉須重兵防堵九江城西龍開河地面得勁兵駐守可與瑞昌馬頭接應再將河口挑挖寬深以所挑之土培高基址堅築土城與郡城犄角以障衛陸兵而遷駐水師於黃梅之新開鎮小池口等處扼要築堡防賊偷渡卽與武穴鎮沿江接應賊匪四面受敵必不致徑犯長江該處情形

是否如此布置著陸建瀛張芾會同向榮迅速籌辦  
一面知照湖北督撫一體辦理

十九日甲子陸建瀛奏言臣行抵湖北廣濟地方

飭令壽春鎮總兵恩長督兵趕赴下巢湖左右  
駐紮隨接向榮知會賊匪擄船千餘隻水陸並  
下恐上游兵單萬難堵截須撤赴九江併力合  
剿以期有濟臣當照會恩長酌量辦理一面飛

卷之四  
三十一  
咨江蘇安徽各撫臣於入境水陸要路嚴兵防禦旋據前路探報該逆於正月初八日五鼓順流蔽江而下壽春鎮總兵恩長分水陸三路接戰督率水師太湖協副將劉長清等連開大礮擊碎逆船三十餘隻擊斃賊匪先鋒四五百人該逆抵死抗拒愈聚愈多該總兵自用鳥槍炸裂猶揮兵轉戰力竭投水身死臣所帶兵勇均

隨恩長赴防臣營僅留四百餘名而該逆注意江甯省城竟欲分股竄擾現在九江一帶緊急臣所帶兵丁不敷勦辦雇勇亦未到齊適聞向榮統帶重兵前來急圖面商一切本日前途探稱該逆已在姑塘一帶放火伏思江甯爲三江根本重地乃蘇浙淮揚之屏障該逆既有徑竄滋擾之說則關係更重臣自應趕回江甯會同



祥厚楊文定福珠洪阿等趕辦防堵事宜維持大局其江西既有向榮安徽亦有周天爵均可與各撫臣妥商防守臣未便稍事拘泥

同日蔣文慶奏言本月十一十三等日疊據臬司張熙宇等稟報探得賊匪大隊已過老鼠峽督臣陸建瀛退駐九江彭澤地方距小孤山五里又於十三日據副將田大武稟報陸路賊匪

甚衆已抵湖北雙城驛地方離宿松界不過數  
十里伏思賊匪水陸兼進均已逼近皖界若長  
驅徑過則各該處所駐兵勇至多亦不過千餘  
名斷難阻遏現各省陸續到兵除添助小孤山  
駐防及撥赴宿松陸路堵守外省垣存兵按垛  
派人尙不敷用而所調浙江山東江蘇各省官  
兵尙有未到者二千餘名疊次迎提杳不見至

此時水路堵截萬分喫緊督臣陸建瀛旣因賊氛近迫九江不能溯流直上而九江以下隘口惟小孤山爲天生險要實江南數省咽喉若舍之不守則過此以往由皖省直達金陵並無可守之險矣均奏入

上命軍機大臣傳諭向榮陸建瀛祥厚霍隆武文藝楊殿邦楊文定蔣文慶張芾曰陸建瀛前赴九江由水

路行走已覺遲緩乃抵潯十日毫無調度賊鋒甫接  
一戰而潰以致總兵恩長陣亡束手無策藉口防堵  
江甯竟委江西安徽於不顧實屬大負委任恩長旣  
經殉難尙有劉長清管帶兵勇船礮此時駐紮何處  
所帶馬礮有無遺失前調之楊冠春周鼈方翔等何  
以不能接應張芾以寡弱兵力駐守九江現在情形  
若何至周天爵幫辦安徽防堵尙未奏報起程且並

無管帶之兵向榮派赴九江之兵未知何時趕到而陸建瀛亦未與向榮晤面何以輒稱安徽有周天爵九江有向榮恃爲無憂以便其抽身之計耶江甯省城誠爲重地該大臣旣知折回與將軍巡撫等極力保衛豈九江安徽非陸建瀛管轄之境設有疏失罪尙可追耶該逆旣已水陸並下安慶最爲危險必當先其所急著向榮陸建瀛竭力設法堵截小孤山等

險隘此處不守縱賊直下卽陸建瀛欲以留營之兵  
四百名捍衛江甯庸有濟乎惟有扼險堅守與向榮  
合力夾擊俾賊匪不得疾駛而東一面嚴防安慶與  
蔣文慶激勵紳民妥籌固守並著飛咨周天爵促令  
迅赴安徽協同防堵周天爵如有素所練習之壯勇  
可資捍禦者並卽帶往酌量調撥浙江等省官兵如  
何催令趕到均卽相機布置至江甯籌備防堵節經

諭令祥厚楊文定等慎密辦理此時一聞警信深恐  
人民張皇且賊勢緊急尤須偵探確實以備不虞仍  
著祥厚等妥速籌商其揚子江京口一帶南北咽喉  
關係甚重萬不可令匪蹤闖入著楊殿邦察看形勢  
卽行籌辦

上又命軍機大臣傳諭琦善曰賊匪未經竄出武昌朕  
早料其東下長江安徽緊急疊經降旨著該大臣先

令陳金綬迅帶精兵馳赴安徽迎勦該提督素性勇往何以兼旬以來並未報起程日期現在到豫官兵數已不少儘可酌量抽撥催令帶往乃竟置若罔聞坐視鄰省危急不救是何居心今賊勢已全股東下豫省情形與前不同豈可以有有用之兵置之無用之地儻以兵未到齊爲詞不卽赴援或稍有掣肘俾陳金綬不能趕緊啟行致安徽復有疏失朕必將琦善



在軍前正法斷不饒恕如能出奇制勝力挫賊鋒保全下游大局朕仍望琦善努力成功爲朕分憂也

上又命軍機大臣傳諭陳金綬曰前因賊匪勢將東竄下游喫重朕以陳金綬久歷戎行屢次諭令管帶精兵迅赴安徽一帶迎剿該提督疊奉嚴旨自應趕緊起程何以遲之又久未據奏報豈因琦善以兵未到齊爲詞致令遲延不進耶現在賊匪東下安徽十分

危急亟望該提督帶兵赴援陳金綬係朕特命幫辦軍務所有豫省調到之兵卽著擇其精銳者自選數千星速馳往扼要援應至賊已乘船東下豫省情形與前不同其分撥各路防守之兵亦可酌量抽回先其所急該提督軍營必須文員襄辦一切卽著勝保同往並將起程日期迅速奏報陳金綬與向榮皆昔日楊遇春部下將弁軍情緩急自必熟諳長江兩岸

安徽江甯兩省安危所繫汝兩人聲勢聯絡相機進攻若能出奇制勝保衛江東庶不負朕委任倚重之至意也勉之懷之

上諭內閣曰賊匪自竄踞武昌後疊經降旨令陸建瀛馳赴九江會同張芾勦辦乃由水路前進已覺遲緩及聞所派鎮將於上游接仗失事該大臣輒行退保江甯毫無布置實屬大負委任陸建瀛著先行革職

仍責成辦理地方軍務一面防守江甯一面派兵援  
應安徽以觀後效向榮現已馳抵九江著卽分派將  
弁督帶精兵奮力追勦前經疊次降旨諭令琦善先  
飭陳金綬帶兵馳赴安徽策應乃本日據蔣文慶奏  
報河南援兵尙未到皖陳金綬是否起程琦善何日  
前進迄今未據奏報江皖待援甚急該大臣豈竟置  
若罔聞琦善著先行革去都統銜以示薄懲現在賊

匪東竄密邇九江陸路賊匪距宿松甚近若不痛加  
勦洗則蔓延幾不可問陳金綬著星馳赴皖琦善亦  
著督兵前進爲陳金綬接應仍隨時知照向榮等於  
大江兩岸互爲犄角分路夾攻勿任賊匪順流直下  
儻該大臣等仍前玩泄致江皖或有疏虞朕惟知執  
法從事不能稍從寬典也

上又諭內閣曰安徽壽春鎮總兵恩長督兵趕赴九江

上游迎勦該總兵分三路接戰督率各師擊碎逆船三十餘隻擊斃賊匪先鋒四五百人乃因鳥槍炸裂寡不敵衆力竭捐軀殊堪憫惻恩長著加恩追贈提督銜卽照提督陣亡例賜卹以慰忠魂

同日陸應穀奏言粵匪滋擾楚疆豫省籌備防堵事宜臣兩次奏請部撥銀七十萬兩現在琦善統兵會勦添調吉林黑龍江兵四千名山西

等處馬一萬匹軍裝器械馬乾等項需用益繁較諸防堵用項不啻倍蓰前撥七十萬兩除已支用外僅敷兩月餘之用合無仰懇

天恩飭部於鄰近省分指撥一百萬兩兼程解豫以備支應奏入得

旨戶部速議具奏旋經戶部奏言臣等通盤籌計現在江西安徽等處防剿緊要自應先其所急豫省

經費尙敷兩月有餘況所謂兵馬疊奉

諭旨飭催進剿豈容久駐豫境該撫請續撥一百萬兩  
實未通籌全局臣部未便照給以致顧此失彼  
擬將該省清查收存及應解部飯銀兩內十四  
萬餘兩並官員捐餉十一萬餘兩准其留作軍  
餉支銷當敷數月支發相應請

旨責成該撫樽節動支毋許冒濫奏入



上從之